



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 8

Pakistan-China tesendaktep putu tasen ka tenzükogo: PM Shehbaz

Asaya ajak kasasa benshiang: Chirag Shetty



VOL. XXI ISSUE NO. 266 (ADOK 266)

DIMAPUR

TENTONÜ (MONDAY)

CHITENI (JULY) 08, 2024

₹ 5.00

NHIDCL anema ken o benoktsüla: RPP

Dimapur, July 7, 2024 (TYO): July 4, 2023 nü NH-29 Patkai bridge-Khoukidolong lenmang nung lung anenzüka alua nisung 2 taküm samatsüba den gari aika raksatsüba sülen küm ka lir ano iba mesükba lendong atalokogo. Anungji item lendong atema NHIDCL anema ken o benoktsüla aser PDA sorkaria High Level Technical Committee (HLTC) report yimjak nung metetdaksütsüla ta Rising People's Party (RPP)-i takhangba ka agütsüogo.

Taküm July 5 nü atalokba lendong nung nungküme nungi lung anenzüka alua Bolero gari ka raksatsü aser nisung pezü yiru.

Yaküm lendong atalokba sülen NDPP-BJP teloktep PDA sorkari kecha meinyak. Parnoki temulung magütsüba nungi jenbutüsü atema High Level Technical Committee (HLTC) ka shim saka tanü tashi iba luden nungi osang kecha mali ta RPP-ashi.

Yaküm lendong atalokba sülen NHIDCL-i mapa shitak

meinyakba atema langka karbo shir mashi. NHIDCL mesüra sorkar ketdangsür kar aija mapa nungi anentsü mesüra tepuokdak ayu asü mayu. Nagaland nung NHIDCL madak ketdangsürji state nodal department - R&B (National Highway) lir anungji sorkari parnok dak langkabo inyak asü meinyak? ta RPP-isa asüngdangogo.

Yaküm lendong atalokba sülen RPP-i Chumoukedima Police Station nung FIR ka benoka liasü saka nisung taküm samaba atema NHIDCL ketdangsür dak kecha meinyak. Anungji PDA sorkari lendong atalokba shia "Travel Advisory" agüja aruba agi dangbo azüklen nungi lung anenzüka aluba sota metutetsü ta parnokisa ashi.

RPP-isa state sorkar dang 2023 küm NH-29 Patkai bridge-Khoukidolong lenmang nung tasür kibongtem aser yirur nem senotsü teyari agütsü asü magütsü aser tawa yirur nem ang teyari agütsütsü asü magütsütsü ta asüngdangogo.

BJP nem deputy chairperson lemzüktsütsü mepishir

Dimapur, July 7, 2024 (TYO): Nagaland ULBs election nung NDPP aser BJP külemi toktepba municipal bodies nung BJP councillor tem deputy chairpersons shimtsü mepishir ta Bharatiya Janata Party (BJP) Legislature Party-ashi.

ULBs election takok ngua agiba atema Chief Minister Neiphiu Rio nem tenüngsang agütsür aser pa lenisüba kübok municipal aser town council elections agiba ajanga PDA

teloktep tashitaitba kümogo ta BJP Legislature Party-i metetdaksü.

Nagaland nung municipal aser town councils nung BJP party nungi government nominees shimoktsü mepishir aser iba ya pei pei tesem nung councillor tem den asüngdangtepa inyaktsüla ta BJP Legislature Party-isa ashi.

PDA tangatetba nung ajemdaker Chief Minister-i onok temepishibatem agizüktsü imlar, ta parnokisa ashi.

Nagaland nung ULBs atema directorate balaka amenoktsü akok

Dimapur, July 7, 2024 (TYO): Nagaland nung Urban Local Bodies (ULBs) election takok ngua agiba sülen state sorkari Urban Local Bodies (ULBs) atema Directorate ka amenoktsü lenmangtem bushitepba metetdaksüogo.

Hokolbarnü Dimapur Municipal Council (DMC) aser East Dimapur Town Council (EDTC) nungi NDPP councillors nem tenüngsang agütsüba sentong ka agidang Chief Minister Neiphiu Rio-i iba osang lemsatep.

State sorkari ULBs nem grants agütsüna den Union finance commission aser sendaktepa aliba ministry tem nungi senotsü lemzüktsütsü anungji Nagaland nung ULBs tashi itshitsüla ta pai ashi. ULB maparen acha-ayangtsü

atema Directorate temeja ka alitsü nungdak ajiteta olemtepar. Iba directorate nung ketdangsür tajungtem mapa lemzüktsütsü aser parnoki councillors nungita yaritsü ta CM Rio-isa ashi.

State sorkari political party tem aser kin balala dang asüngdangtepa nisungtem shimoktsü ta paisa ashi.

Eastern Nagaland tesemtem nung ULB elections magitetba atema khuret abener aser sorkari item tesemtem renlokdaaksütsü atema government nominees shimtsü tebilemba lir ta CM Rio-ashi.

ENPO-i shilem magiba ajanga tetsükdaaksü ajuruogo saka mapang tajung ajurutsü aser Nagaland state renloka aiba nung parnokisa külemi yariteptsü ta pai ashi.

NHIDCL-i NH-29 nung mapa shitak meinyaker: State sorkar



July 5, 2024 nü Dimapur-Kohima 4-lane National Highway 29 kübok Paglapahar lenmang azüklen nungi lung anenzüka alur Mahindra Bolero gari ka raksatsür aliba angur.

Dimapur, July 7, 2024 (TYO): Nagaland sorkari Dimapur-Kohima 4-lane National Highway 29 nung senzusenbongertem kümzüka ayutsü atema kanga nendaka mapa inyaker aser iba atema National Highway 29 aser talisa Paglapahar tesem nung mapa kar inyaktsü shiyonga arur.

State sorkari National Highways and Infrastructure Development Corporation Limited (NHIDCL) dang mapang shia senzusenbongertem lendong nungi jenbutüsü atema mapatem inyaktsü shijen shia arur ta Public Works Department (National Highway)-i ashi.

January 22, 2024 nung State Cabinet-i Paglapahar lenmang nung tebilemtsü onüktem lemsatep aser idangii independent third party ka nem kanga junga shisadanga mapa inyaktsü atema tebilembatem shidaksütsü telemteba agia liasü ta Nagaland PWD(NH)-i ashi.

Iba mapa ya IIT Guwahati nem

nungloksü aser parnoki yakta maparen tenzüktsü. State Cabinet-isa NHIDCL dang Dimapur-Kohima Package-II mapa teinyakdak liaka completion certificate agütsüba atema ashishitepogo ta parnoki ashi.

April 2024 nung Nagaland sorkari NHIDCL dang Paglapahar lenmang nung safety measures inyakba osang tejangia meshia liasü aser safety measures shitak maliba ajanga lendong kar atalokra NHIDCL-i tebilemtsü khuret abentsü metetdaksüogo.

July 4, 2023 nü Paglapahar nung lung anenzüka aluba sülen state sorkari July 5, 2024 nü High-Level Technical Committee (HLTC) ka tentetogo. Parnoki July 19, 2023 nü NHIDCL nem osang sangoktsütsü. State sorkarisa NHIDCL dang tang atema safety measures kar inyaktsü shiogo ta Nagaland PWD(NH)-i metetdaksü.

December 2023 nung state

sorkari IIT Bombay nung Independent Technical Expert Committee ajanga agütsüba report ka nung keta aliba onüktem NHIDCL den lemsatep aser parnok dang NH-29 nung lendong mataloktsü atema meyipa reprangshia maparen inyaktsü tetuyuba agüja liasü.

April 11, 2023 nungi June 19, 2024 tashi state sorkari NHIDCL dang tertiben (18) safety measures indang lemsatepogo. Yamaji süaka tang tashi parnoki mapa balaka mali aser tawa Paglapahar nung lung anenzüka alua nisungtem yirutsüba aser gari raksatsüba ajanga tangsa mapa kar inyaktsü nungdakba sayur, ta Nagaland PWD(NH)-i ashi.

NHIDCL-i item onüktem süoki ia bilemtsüla aser tekaratiba nung Dimapur-Kohima 4-lane highway nung senzusenbongertem lendong nungi jenbutüsü teinyaktsütem inyaktsü ayongzüker ta parnokisa ashi.

Rahul Gandhi-i Assam nung anenzüker ang Manipur semdangtsü

Guwahati, July 7, 2024 (Agencies): Congress MP Rahul Gandhi-i Leader of the Opposition ama Manipur mezüng semdangba ajanga Prime Minister Narendra Modi-ia Manipur semdangtsü osang sangoktsütsü imlar.

Rahul Gandhi-i Hombarnü Manipur semdangi maodang tamasa Assam kübok Cachar district nung Manipur nung jenoka alirtem den ajuruteptsü.

"MP aser Lok Sabha nung Leader of the Opposition Rahul-i New Delhi nungi Kumbirgram Airport, Silchar tashi tayimtsü ajanga arutsü. Iba sülen pai tamasa Manipur nungi Silchar nung arua jenoka alirtem den ajuruteptsü" ta Assam Congress president Bhupen Kumar Borah-i tanü ashi.

"Hombarnep 9 :00 ako meta pa Silchar airport tonga arutsü aser gari janga Manipur kübok Jiribam-i aotsü. Pai Assam nung mezüng Manipur nung den ajuruteptsü. Jiribam nungi pa Silchar airport-i meyipa arutsü aser idak nungjagi Imphal-ia aotsü" ta Borah-ashi

Rahul Gandhi-i Manipur nungi arua jenokertem ajurutepa sensaksemba ajanga tensa osang

tejangjaba metettsü merangtsü" ta Assam Congress president Borah-isa ashi.

"Prime Minister Narendra Modi aser Home Minister Amit Shah nati Manipur sentoker. Tenati Manipur tebilemtsütem koktettsü memeranger. Rahul Gandhi-i semdangba ya kanga tongtipang kechiyong pai Manipur nung yimjung bener arunür" ta Borah-isa metetdaksü.

Rahul-i Imphal nung anogo ka amongtsü aser July 9 nü Delhi-i meyipa aotsü ta paisa shisem.

Manipur nung Rahul-i tesem asem- Jiribam, Churachandpur aser Moirang (Bishnupur district) semdangtsü. Paisa Manipur Governor Anusuiya Uikey den ajurutepa sensaksemtsü.

"Yaküm May ita nungi PM Modi-i Manipur mesemdangba atema Congress-i jembiyonga arur. Tang onoki mapa agi sayutsüla anungji Rahul Gandhi-i yaküm May ita nungi tenzüker asembenbuba Manipur semdangtsü. PM Modi-i meinyakba ozü lenniri inyaktsü ta onoki sayur" ta All India Congress Committee (AICC) lennir kati ashi.

"PM Modi-i bendang linüktem semdanga senzüdaang, ozü

lenniri mapang talangka senzüka yutsüba state nung sensotem den külemi noktaker ta iba sentong ajanga sayutsü" ta paisa ashi.

PM Modi-i July 8-9 anogotem Russia semdangtsü aser iba sülen July 9-10 anogotem Austria semdangtsü sentong lir.

Manipur kübok Jiribam nungi nisung 1,700 tema Cachar district kübok Lakhipur area nung jenoka lir. Taoba ita mepetmesü adokba sülen parnok Barak River ajanga orr Assam nung jenok.

Assam police-ia iba tesem nung security akangshiogo aser Manipur nung dang kecha mashitsü tetuyuba agüja lir.

Assam chief minister Himanta Biswa Sarma-ia June 17 nü humanitarian grounds nung Manipur nung nem teyari agütsütsü metetdaksü saka ozüng alema inyaktsütsü tenokdangba agütsüogo.

June 23 nü Inspector general of police (IGP) (Law and Order), Assam, Prasanta Kumar Bhuiyan-ia Manipur nungi arurtem dang "nenok Manipur nung masü Assam nung lir anungji ozüng alema inyaktsütsü masütsüla" ta shia liasü.

Bangladesh refugee tem meyipa meyocteter: Mizoram CM



Mizoram chief minister Lalduhoma-i Prime Minister Narendra Modi ajuruba noksa angur.

Aizawl, Chiteni/July 07 (Agencies): Kidanger linük Bangladesh nungi aruba refugee tem nem Mizoram sorkari anisüngzük agütsüba tensa angatetsü asoshi Mizoram chief minister Lalduhoma-i Centre dang ajungshia liasü.

Ato Kilonser Narendra Modi den senden ka amenba mapang, tang Delhi nung alisang Mizoram CM Lalduhoma-i Bangladesh kübok Chittagong Hill Tracts (CHT) nungi Zo ethnic nüburtem arua jenoka aliba ozü sorkari meyipa meyocteter, ta metetdaksü.

2022 küm nungi Mizoram nung jenoka aliba Bangladesh nungi nisung aika Bawm kin nungi lir, koba ethnic Mizo kin ka lir aser ano aika aittsü meranger, ta pai ato kilonser dang ashi.

Lenir ana ya Aizawl tiyong nung aliba Assam Rifles base ya

anüdoklen Zokhawsang-i belentsü aser Mizoram sorkar indang flagship programme aser policy balala indang jembia liasü. Bangladesh army aser Bangladesh nung state balaka meshiba telongpur telok Kuki-Chin National Army (KNA) tsüingta raraba ajanga ethnic Bawm nisungtem ya Chittagong Hill Tracts nungi jena arua Mizoram nung 2022 küm November ita nungi jenoka alir.

Bangladesh nungi Zo ethnic nübur 2,000 jungnüa Mizoram nung jenoka lir, ta state home department ketdangsür kati ashi.

Külen Border Security Forces (BSF) ajanga Mizoram nung jenoktsü merangba Bangladesh refugee tem meyipa yokba atema India, Bangladesh aser Myanmar nungi Chin-Kuki-Mizo-Zomi kin asoshi nokdakba Zo Re-Unification Organisation

(ZORO)-i aika liasü. Hokulbarnü Bangladesh indang CHT nungi kibong 32 nungi nisung 93 shi Mizoram south tsütsü Lawngtlai district kübok Damped-II yimtsüing ait, ta parnoki ashi.

Indo-Bangladesh arütsü anüker BSF ajanga item refugee indang osang tejangja bendenba sülen Hokulbar nikongdang Bangladesh leni meinzüka yok, ta parnoki ashir.

Ano June ita tiyonglen Mizoram-i aitba nisung 200 shi BSF temi meinzüka yok ta ashir.

Bangladesh refugee tem ya tang tashi arem nung nemzür aser parnok pei yimtsüing bushia aotsü tsübor, ta ZORO ajanga ashir.

ZORO ajanga state sorkari dang Bangladesh nungi jena aruba Zo ethnic nisungtem ya kumzüka ayutsü ajungshir.

Manipur nung September ita tashinung süngdong crore pezü atemtsü

Imphal, Chiteni/July 07 (Agencies): State nung süngdonglidong timba kumdaktsütsü mechi sorkari September 2024 tashinung jenjang aketba süngdong crore pezü atemtsü sentong lir, ta Manipur sorkar nung Forest & Environment minister, Thongam Biswajit-i Honibarnü sangdong.

Honibarnü Imphal West district kübok Lamdeng Makha Leikai nung 75th Van

Mahotsav benjongmung bilemteta süngdong atemba sentong ka tongti tesemdanger ka ama jembidang Biswajit-i iba o ya ashi.

Arem chidokba, ayongkum agiloka aoba aser poppy plantation ajanga Manipur nung tüzümsüing ya adoker, ta pai ashi.

Küm shia ali tasazük 420 sq. km nung arem chidoker aser yamai dang ora küm 10 nungi 15 tsüingta timtem tulu alitsü, ta ashi.

Iba sentong ya Forest Department ajanga "Plant for Mother" omen kübok ayongzüka liasü.

Van Mahotsav ya arem wazüka ayutsü aser libajen atema süngdonglidong atemtsü ajungmesoba sentong ka lir.

Iba sentong nung Lamsang A/C nungi MLA Sorokhiabam Rajen Singh aser Central Forest Division nungi Divisional Forest Officer (DFO) dena liasü.

Assam Rifles-i Chenmoho nung senden ayongzük



Dimapur, Chiteni/July 07 (TYO): Assam Rifles temi Mon district kübok Chenmoho yimtsüing nung security senden ka July 5, 2024 nü ayongzüka, kong yimtsüing pongu nungi ketdangsürtem dena liasü.

Region nung yimjung-tesunep temaba jenjangi ajungkettsü aser nüburtem temulung nung tetsübo melidaktsütsü mechi iba senden

ya ayongzüka liasü. Mon district kübok security dak sendakba ken o, tarutsü nung lendong timtem majurutsü asoshi osangtsüsang lemsateptsü, Security Forces aser nüburtem tsüingta arok ajangzüktsü asoshi amalitep akatsü onük tem iba senden nung jembia liasü.

Iba senden nung adenertem dang Armed Forces nung job

opportunities aser recruitment balala aser project balala inyakba indang osang lemsatepa liasü aser medical facilities balala agiba nungib ajangzüktsü ashi.

Assam Rifles temi iba ama mapa tajung inyakba atema nüburtemi pelaba lemsatep aser tarutsü anogotem külemi teka amteper yaritepa aotsü mulunga aliba lemsatepa liasü.

Nagaland Angh-i Tuluni benjong salem abener

Dimapur, Chiteni/July 07 (TYO): Sumi adianu aser adianutsür tem dangi tepela Tuluni benjong salem abener, ta Nagaland Angh La Ganesan-i sangdong ka ajanga ashi.

Alu nung metsü yokba mapang tembanga aser aluruwa tenzükba

benjongmung nenoki amungdang nenok kibong nung yimchiyimjung aser tepela agi süngdakjang ta moatsür.

Iba benjongmung ajanga kin tsüingta tesendaktep, telungjem aser temeimtep tali adokdakjang ta moatsür, ta Nagaland Angh ajanga ashi.

LKM-i tenüingsang agütsür

Dimapur, Chiteni/July 07 (TYO): 2024 Urban Local Body (ULB) Election nung Langpangkong senso shirnokisa takok tulu nguogo, nenok ajak nem Langpangkong Kaketshir Mungdang (LKM) Mendenti ajanga tenüingsang tulu agütsür aser Tsüingrem tenüing asanger, ta LKM tir Imlinok aser tongti zülur Meyitongpang nati sangdong ka ajanga ashi.

Nübur tenzüktsü tangatetba aser tejangraba nung Tzükongsanger shirnokisa shilem tulu agiaka takok monguteti lir, maneni tangatetba aser tejangraba tulu meremsepi tarutsü nung takok angutsü yimlaseta atar, ta ashi.

Nenok shisa aser tangatetba tajung agi Naga Lima tejakleni anitsü asen kaketshir mungdang sarasatem, ta LKM sangdong ajangasa ashi.

DHD nung mejangjaba nisung tasü mang ka lir

Dimapur, Chiteni/July 07 (TYO): Akash ta ser tebur arishi küm 30 tain ka District Hospital Dimapur nung aliba male ward nung temang anepalutsü atema admit asü aser July 5, 2024 nikongdang 4:30 ako meta süogo, ta District Hospital Dimapur nung aliba doctor kati July 6, 2024 nikongdang 5:10 ako nung tezüluba osang ka Dimapur Police nem agütsü, ta sangdong ka ajanga ashi.

Iba osang nung ajemdaker East Police Station duty party tem nüngdakba mera agitsü atema mozüki tonga ao. Iba

nisungba ya anepalur kata mali ser June 3, 2024 nü mozüki indang Emergency room-i bener arua liasü aser temang anepaluba mapang asü. Pa ya 'natural death' südi ta ashir.

Ozüng agi melaba maparen ajak tembanga sülen tasü mang ya jangjatetsü atema District Hospital morgue nung yua lir.

Iba dak sendakba nung kibur/kinunger/tembar temi Officer-in-charge, East Police Station, Dimapur den Mobile No. 7085055020 ajanga tongteprateptsü akok, ta sangdong ajanga ashi.

Home Minister Amit Shah-i Assam tüzümsüing tia mejangja: Gogoi

Guwahati, Chiteni/July 07 (Agencies): Assam nung tüzümsüing tensa indang Union Home Minister Amit Shah-i jembiba atema Lok Sabha nung Indian National Congress indang Deputy Leader Gaurav Gogoi-i sashi-sashia aitsü aser parnok dak tangatetba peria mali ta ashi.

Gogoi-i social media sapang X nung Assam tüzümsüing tensa indang rateta shia liasü, kong nisung takum 70 dak tema samaogo, koba Shah-ibo tüzümsüing mesük tensa ka dang lir ta shia liasü.

"Minister, Home Affairs, Amit Shah-i Assam nung lendong timtem ajurua aliba indang sangdong agütsüba yagi pa dak shisatsü peria maliba aser temulung magütsüba sayur. Tüzümsüing agi nisung 70 dak tema takum samaogo, saka Minister-i iba tensa ya tüzümsüing mesük tensa ka dang lir ta ashi," ta Gogoi-i temulung mesüi zülutsü.

Shah-i Assam nung tüzümsüing dak sendakba maparen ketdangsüba atema Gogoi-i aija liasü.

Shah-i jembiba ajanga BJP sorkari Northeastern state tem nung tüzü-mopung melenba ajanga kongshiba nung junga meyari tamakok aludaktsüba sayur, ta Gogoi-i ashi.

Tzünglu kanga sashia aruba ajanga Assam nung tüzümsüing adokba indang Union Home Minister Amit Shah-i jembir mapang tatsüka lir Gogoi-i pa aija liasü.

National Disaster Response Force (NDRF) aser State Disaster Response Force (SDRF) tem relief operations nung yakyaka shilem agir aser timtem ajurua alirtem nem anibelem mesasai teyari agütsür, ta Shah-i shia liasü.

Tesüba ita Assam nung tüzümsüing sashia adokba ajanga nisung aika takum samaogo, ki o jen raksatsü, lenmang shebang, alu aser kiset shiruru samaja liasü.

Iba tensa ya ajanga nisung aika talidak ki makai akum. Tang tashinung district 30 nung tüzümsüing yagi nisung million 2.42 dak kongshia lir.

Item rongnung Dhubri district nung tamajungtiba kongshi, kong nisung 775,721 dak kongshia liasü.

Alu raksatsüba tsütsü tsük aser aonsotsü yoka aliba ali hectares 63,490.97 tzu agi mubang aser revenue circles 112 kübok yimtsüing 3,518 nung kongshia lir.

Iba den Deobarnü tashinung kiset shiruru 92 dak tema tzu nung arakseta süogo.



July 07, 2024 nü New Delhi nung student organisations balala nungi kaketshirtemi NEET exam nung ochimashi anema longkak aitdang tangokba noksa nung angur.

OFFICE OF THE LANGPANGKONG KAKETSHIR MUNGDAŃ
Langpangkong Students' Conference
 H.Q. Chuchuyimlang - 798614. Dist. Mokokchung : Nagaland
 Email: Langpangkongkaketshirmungdang@gmail.com

TENÜNGSANGAGÜTSÜR
 2024 Urban Local Body (ULB) Election nung Langpangkong Senso shirnokisa takok tulu nguogo, nenok ajak nem Langpangkong Kaketshir Mungdang (LKM) mendenti ajanga tenüngsang tulu agütsür aser Tsüngrem tenüng asanger.
 Nübur tenzüktü tangatetba aser tejangraba nung Tzükongsang shirnokisa shilem tulu agiaka takok monguteti lir, maneni tangatetba aser tejangraba tulu meremsepi tarutsü nung takok angutsü yimlaseta atar.
 Nenok shisa aser tangatetba tajuung agi Naga lima tejakleni anitsü asen kaketshir mungdang sarasadem.

Sd/- **IMLINOK**
 President, LKM

Sd/- **MEYITONGPANG**
 Gen. Secretary, LKM

South Kashmir nung security sepaitemi kiralongrar 6 khasetogo

Srinagar, July 07 (Agencies): Amongnü South Kashmir nung kiralongrartem den raradang sepaitemi kiralongrar trok khasetogo, aser kasa rara nung sepaitema ana süogo.

Jammu & Kashmir Director General of Police (DGP), R.R. Swain-i, Kulgam district nung tang tashi nung kiralongrar trok khasetogo, aser tang-a kiralongrartem mita toudak lir. Kiralongrar trok khasetba ya takok tuluka lir," ta metetdaksü.

"Tang tashi nung kiralongrar tasü mang trok ngutetogo. Tesem balala ana nung khatempa liasü. Kiralongrar trok khasetba ya alizü ng ka tongtetba lir. Tang tashi tesem ka nungbo kiralongrartem mita toudak lir," ta pai osangbenertem nem metetdaksü.

Kulgam nung khatepdang sepaitema ana süogo. "Tesem ka nung kiralongrartem mita toudak lir,

anungji tang tashi nung khasetba kiralongrartem maitsüji mejangja. Kiralongrarem mita aoba operations tembangba sülen ang parnok ajak indang maitsü jangjatsü," ta Swain-isa metetdaksü.

Swain-i, "Kulgam nung operation aoba takok anguba ya nüburtemi maneni nungita yariba ajanga lir. Tsükchirtemi maneni parnok mapa inyakyonga kobi melii onoki kiralongra anema raraba ya tatembang kati arudaktsütsü," ta metetdaksü.

Jammu nung tensa metetdakja DGP-i, iba region nung security dak sendakba tebilemstsü liasü, ajisüaka tangbo tensa melenshiogo, ta ashi.

"Kiralongra asentenshitsü atema parnoki meranga liasü saka parnoki tamakok nguogo. Parnoki telemsa adokdaksütsü merang saka tamakok angu," ta paisa shisem.

Hathras nung mangyimer kibong-temi Bhole Baba aputsü akhanger

New Delhi, July 07 (Agencies): Tawa Uttar Pradesh kübok Hathras nung yimsü dak sendakba sentong ka nung nisung 121 ajemseta asüba tatalokba ken o nung tongti aibelener ka apuba sülen iba lendong nung asür 121 kibongtemi Bhole Baba aputsü takhangba agütsür.

Uttar Pradesh Police-i Hokolbarnü Devprakash Madhukar den nisung ana apu. Madhukar apuba sülen pa anogo 14 atema judicial ket nung agütsüogo. Bhole Baba atema sentong ayongzüker tongti rongnung Madhukar densema liasü.

Iba ken o dak sendakba FIR nung Madhukar tenüng dang tetshia lir. Police-i iba sentong

agitsü atema yimtenren party kari senotsü agi yaria ali asü masüar bushisüngdangdar.

Hathras nung nisung 121 ajemsetba dak sendakba nung osangbener den jembidang Bhole Baba-i, "July 2 nü tatalokba sülen ni kanga mepelai alir. Iba tejashi tizüktetsü atema Tsüngremi kü nem tashi agüjang ta sarasadem. Yimlibilema sorkar aser administration dak tamang katettsüla. Iba lendong ataloktsüsa inyakterem dang tai matoktsü ta ni amanger. Kü lawyer AP Singh ajanga ni committee nung züngsemtem dang mangyimer kibongtem aser yirua alirtem nungita yariang aser akümüli piyong parnok yariang ta tuyuogo," ta

metetdaksü. Ajisüaka iba lendong nung takoksa angur aser mangyimer kibongtemibo tangsa Bhole Baba aputsüla, ta akhanger.

Iba lendong nung asür ka kinünger, Hridesk Kumar-i, "Baba-i anogo pezü tashi atsüka liasü. Pai pasasa tejakleni arutsüla. Pa ya anüng-ali ajak nung kibur süra pai tejakleni arutsüla liasü. Ato kilonser (Narendra) Modi, ajaki tejakleni arur, süra pai kechi timtem ajangshir. Pa Mainpuri nung par kidang anisüngzüker. Nisung jenti asüba kasa anogo nungjisa pai nüburtem tia metetpelatsüla liasü. Onoki Baba indang sentongtem nung madentsü," ta metetdaksü.

Armstrong tepsetba ken o ya CBI nem agütsütsüla: Mayawati

New Delhi/Lucknow, July 07 (Agencies): Amongnü Bahujan Samaj Party (BSP) tongti lenir, Mayawati-i, Tamil Nadu nung BSP Tir, S K Armstrong tepsetba ken o bushisüngdangtsü atema CBI nem agütsütsüla, ta takhangba agütsü.

BSP leniri Tamil Nadu sorkar dang iba ken o ya CBI nem agütsütsüla, ta mepishi.

Chennai nung BSP lenir, Armstrong tepsetba sülen Mayawati-i state sorkar, talisa Chief Minister dang state nung tensa azüoktsü metetdaksü. "Ni state sorkar, talisa

Chief Minister dang state nung tensa azüoktsü aser nüburtem tetsübu makai lidaktsütsü atema inyaktsü mepishir. Sorkari süoki ia inyak asübo tai tonglokja alirtem puer lila, ajisüaka parnoki yamaji meinyak, anungji onoki state sorkar dang iba ken o ya CBI nem agütsütsü mepishir," ta lai metetdaksü.

"Tai tonglokja alirtem anema inyaktsü asoshi party nung züngsemtemi inyaktsüla, ajisüaka ozü ng kübok inyaktsüla," ta lai ashi.

Hokolbarnü Chennai nung BSP lenir, Armstrong par ki anasa lia motorcycles nung nisung trok aruba sülen pa tepseta liasü.

Ano tanga osang ka nung, July 7 nü Madras High Court-i Bahujan Samaj Party (BSP) Tamil Nadu unit Tir, K. Armstrong tasü mangji Tiruvallur district kübok Pothur yimdak par kinüngertem li nung aremstsü metetdaksüogo.

Justice V. Bhavani Subbaroyan-i, asüpila dak sendakba 'procession' ji tesü nep nung dang agitsüla aser July 7 nüsa aremstsüla, ta metetdakja liasü.

Nüburtem nem akhüm agütsü daksütsü atema tasü mangji Chennai nung aliba corporation school campus nung yua lir saka July 8 nü school tanaben lapoktsü aliba agi July 7 anogo nungsa tasü mangji aremstsü court-i tuyu.

“CHIYUNGTSÜ SAFETY ATEMA INYAKTSÜJIAJAK KHURET”
NEWSPAPER NUNG CHIYUNGTSÜ ALEPBAANENANG !!!

Food Safety and Standards (Packaging) Regulations, 2018 ozü ng ajanga chiyungtsü aleptsü, nembangtsü, rizü ngtsü mesüra chiyungtsü anganüa agütsütsü atema newspapers/osangkaket shidi amshitsü memelar mesüra totzü nung aruba chiyungtsü nungi totzü tali indoktsü atema-a newspaper amshitsü memelar.

Newspaper nung chiyungtsü aleptsü atema bilemdang nai item ya teti bilemtetang;

- Newspapers nung amshiba ink (shihai) nungji temang nung timtem agütsütsüsa colours, pigments aser additives densema lir, koba ajanga chiyungtsü kanga junga sor süaka chiyungtsüji temang atema majung kümdaktsür.
- Printing nung amshiba ink nungji lead aser insang densema chemicals balala densema alitsüa akok, aser ibaji chiyungtsü nung menakokra ibaji ajanga mapang talangka nungbo temang nung timtem tulu adokdaksütsü.
- Newspapers alemba mapang nung aika ajangshir aser iba mapang nungji tenük agi manguba mesen tapu balala mesüra tanga pathogens balala chiyungtsü nungji menaloktsü akok, aser ibaji ajanga chiyungtsü tamajung chisema timtem balala agi shirangtsü.

Tanga lenmang tajungba kechisa lir;

- Chiyungtsü amshitsü atema yangluba mesüra temelaba agüja aliba materials amshitsüla. Item rongnung wax paper, butter paper mesüra food-grade plastic wraps (cling film wrap) densema lir.
- Chiyungtsü amshitsü atema stainless steel, somomo tou, tou takong mesüra glass pongdang amshitsü akok.
- Ano somomo tou, aou mesüra cornstarch agi yangluba plastics ama eco-friendly aser biodegradable packaging osettem amshitsü akok. Itemji chiyungtsü amshitsü atema ajungba dang masü saka tzu-mopung atema-a junger.

Tashi mangartem Food Safety & Standards Act 2006 nung Arrla 58 kübok temerenshi alitsü.

For any grievances mail usat:foodsafetynagalandhelpline@gmail.com
 or contact us : +91 6009970644
 Time : 11:00 a.m - 2:00 p.m
TUESDAY & THURSDAY (on working days)

State Food Safety Authority,
 Department of Health and Family Welfare, Govt.of Nagaland.



TIR YIMYIM YIMOBILEM (EDITORIAL)

DIMAPUR TENTONÜ, JULY (CHITENI) 08, 2024

Naga nungeri Aor dak imlar

Alima asünungji Naga lima tesem kar nungbo Aor majung jembia alitsüa akok, itemji asenoki manganer kechiyong parnok i asenok indang tamajung jembir. Ajisüaka, ano tesem aika nung, asenok mejuangaka, tang tashi asenok Aotsür Aor ajungba indanga jembir, ano idangjibo asenok pelar kechiyon g parnok i asenok ajungba indang jembir. Ajisüaka, tangari asenok junger -majunga ta ashijabi masü saka asenok shitakba tangar tsungdang koma alir ta asubaji dang tongtibang aser tagitsü asütsü. Iba tangatetba nung kodang asenoki asenoksasa asenok tanü sobaliba aser libaliro jenjang asadandir, yimten yimsüsür, Tsüngrem tenzükertem aser lokti lenirtem dang masü saka nütsüng nübertem tashi nung teimbakati mashilen nungi dang akatsü aser akoktsü merangba purtema ta asadandettsü. Naga nungertemi Yisu ta tenünga tetshia mangashidang asenoki Yisu osang tajung proka Naga nunger ajak amang tia nungi anitet. Naga nungertem dang azungtsü aser zülutsü asenoki sayu. Asenokisa Naga nungertem election agia pei vote peisasa ajentsü yimten yimsüsübaren tajung bener arua sayua tenzük. Asenokisa Naga nungertem dang government office nung mapang shitak amshia inyaksü aser ochishia tenzüksü asoshi o agidang masü mapa agi inyaka sayu. Aji oda, asenoki Naga nungertem dang merarateptsü, nüktapangta mebenshitsu aser yi majemtsü indang sayu aser item sobaliba tamajungtemji anendaktsü. Joko, asenok tamang nung tain küma aiendang sali moko ajak temenen kümdaktsü aser akok tashi mapa ajak nung indang-indanga ochishia inyaksü merangtep. Idangjibo asen tsüraburtem aikati pei taküm aser kibong ajak Tsüngrem nem bendanga agütsür tanela khuret bena memetetba limatem tesem aika nung memetetba purtem nem tanela tekümtet aser nüchi shisatsü ngudakja tenzük. Tanü asenok ajak ya item tsüraburtem chirnur aser semchirsemnurtem lir. Item tsüraburtembo anogosa anogo agia parnok juli nung aya dang achitsü mojitsü telong tilaka enoker tetsüng agi yim ka nungi ka ta oagi osang tajung sayutsüngia jaja. Itemji Naga nunger asoshi tesangwa abenertem liasü aser item tesangwa abenertem nungi jakzükba senmangertemji asenok lir. Ajisüaka, tanü asenokbo asen tsürabur senmangertem memesük mapa meinyaki auyadena akatsü meranger. Asenok Naga nunger lepteptsüngtep anendaktsür kin-iang tanübo lepteptsüngtepa yimten nunga takok angutsü meranger. Tanü asenok akaba ya kechi komaser akaba? Aser tanü asenoki anguba takok ya kechikomaser anguba takok? Item jagi Naga nungertem metsüdaker aser asenoki temulung meyipdaksüba kintemi asenok ngur süngmanger. Aji oda, asenok ajungba agi Naga nunger aika tajung kümdaktsü saka tanübo asenok majungba agi Naga nunger ajak majung kümdaktsüdagi. Asenoki zübazübaa bilemstsüa akok saka asenok ya Naga nunger lenitsü Tsüngremi shimtet, anungji asenoki anibaleni Naga nunger ajunga anidaker. Ibaji asenok asoshi tekümdangtsü tulu lir. Asenoki office nung koma inyaker? Tsüngrem koma tenzük? Election koma agir? E-roll aser Census agidang asenoki koma benshir? Aotsür Aor lenir alidak sübokrem amshir ass mamshir? Pi sen nungi commission agir asü magir? Mapa meinyak ser tiyazü bill yanglur agizüker asü magizüker? Item ya tanü tangari asenok dang asüngdang? Ashiko Tsüngremia asüngdanga alitsü südi. Asenok mejungaka tang tashi tangaribo asenok dang nungi tajung angutsü imlar aser Tsüngremia aochir. Aor dang melenshi nungbo Nagaland melenshitsu ta Naga nungertemi jembir. Aji asen indang tamajung jembitsür masü saka asenok dang nungi tajung adoktsü imlar. Atangji, asenok ajak nung majungbo masü saka asenok kanga majungba tongtibang tesem asem lir. Itemji, mezüngbuba nung ochishia meinyaktetter, tanabuba nung tashiyim aser sen agidang takok angutsü meranger aser tasembuba nung tenüng agidang asenoki Tsüngrem tenzük. Asenoki itemji melenshitetra, idangjisa Nagaland melenshir alitsü. Ibaji Aor dang nungi Naga nunger teimla lir. Ibaji asenoki agütsütettsüla.

OLEMSABANG

MISSION MAPA DEN TASHITEMETET SAYU

~ S. Nuken Longkumer

America nunger Missionarytem par lima nüchiso (Independent) ngur küm 95 sülen asen Naga limai Indiana state USA lima nungi Missionary Dr. lark aser par kipong Tsüngremi yok. Kodang asenoki alima otzüttem aser Mission mapa ainbaji reprangdir, 1600 küm England lima nungi Missionary William Carey kipong India limai arudang America nunger nüchiso mongui liasü, Mission mapa aser küm 177 sülen America nüchiso 1777 küm angu. William Carey India (Calcutta) nung Mission amenlokba 1600 küm aser Dr. Clark 1872 küm Naga limai atuba küm 272 ya asenok koma koda liasü? Tanü alima ya balaka küma ogo ta bilemer, jembir, tzürabur mapang ama alima toa memelenishi, meopong toa küsa adang lir. Kar takumbo tangsa tang itai atutsü pur rong tena ali amai dang ariteba alibasa angur, otzü jembitsü mapang mali, sensak asemstsü sobaliba jembitsü mapang mangur ta jembir, yabo tangatetba tai leni anir amai repranger, Khistan tajung tenla kidang mapang tera talila O jembira 15 – 20 minutes tashi jembirabang Chubatsür ta tejak palaka akumer, mapang memetet jembir pai dang ajak metet ama. Tiazü Christiantem kechiba mapang mangur? Kechiba mali? Kidang mapa aika lir, ainertem arutsü lir, tanurtem anir aotsüba lir, Ak, An terepranger mali, Noah tensa ama asenok kongi aotsü yamai taküm teraksa leni anir? Yamaji tai tangatetba aser tai mapa ajanga ozü limabo asentenshi nung tanüsa temulung meyiper yimdaki aru, par atsü nung tema aliba kozüdong 80 shi ajak lepdok, ya temenen oset, tangbo timtim tia nung lir, oset dak tenük mali tomulungjang maka, alima aser mepong tai mali, meimchir dang tai liasü, taoba mapang 77 – 79 – 1977 – 1979 mapang Aolima aser Nagalima tesem aika nung oset tajung aika raksa-a endok, Tsüngrem O dak masü alima dak rangloker jaja, asenok tenük melapok dang tangarbo küm aika tejaklen liasü Mission mapa 1315 mapang Yokoslavikia lima nungtuogo sayutsüngir ka adok. Iba sayutsungir ya rishikangshi tia aiben ajuru saka pai tatem tashi raraba angutsü. Iba tensa mapang Europe lima nung mission mapa aika inyak ta ashir, Talisa Spain ama, Germany ama, Denmark lima ama otzü ya asenok ajaki meteta lir, saka kodang Careyer kipong England lima toktsür India limai aposoa aru, iba sülen India lima (Calcutta) W.B – nung timtim jenti ajurua anenzük ta ashir, iba tensa nung alidang par chir tambusang süadok, tebuttsü tokolok meshidaki akum. Careyi par lima England nung tenla kidang Tsüngrem tang nangzükba bilemtet. William Careyi par kibong mesütsü lemang kecha makai akum, anungji pai par kipong mesütsü Tsüngrem yanglu tenzük ta otzü ,bushiteter temi sayur. Iba sülen Mission mapa tenzüka ao, otzübo temela saka mapa ya tasak. Kodang tangar lima tiaji repranga yokdir asen aliba yimya aser tangar aliba yimya tetsüngta talangka akümer, kodang Mrs. Gandhi PM. Kaset alima kin ajaki (24 hrs) mang ayim ta ashir. Saka osang tajung prokba yabo küm 2000 shi tema süia aor, saka osang tajung agi matonger million aika lir ta angazüker. alima nung mission otzü bushidanga orapang meilungi jajaba küra amai angateter, melungi jajaba küra ya amang sangwa memejangi pai alizüng atongtsü merang, anungji pai shiruru rounngungi alima nung jajatsü tekaratiba azümongshi madak takok tulu angu. Mission mapaji iba ama alitsü südi ta bilemer, tamakok asen atepzüng nung mission mapa tulu ka lir, tarutsü nung jembitsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Uganda nung CfaN crusades agiba ajanga Arogo kanga indar



Uganda nung Christ for all Nations (CfaN) nungi sayutsüngir, Daniel Kolenda-i crusade ka nung jembidang tangokba noksa nung angur.

July 07, 2024: Uganda tesem ajaklen crusades maneni agiba ajanga nisung aikati Khrista agizüker aser Arogo ainer, ta CfaN-i metetdaksü.

Tawa Islam yimsü alia amangertemi Christ for all Nations (CfaN) nungi sayutsüngir, Daniel Kolenda aser pai aniba telok indang crusades anema timtem agüja liasü.

Africa tesem ajaklen crusades agiba kübok tawa CfaN-i crusades agitsü atema Uganda semdanga liasü, ajisüaka iba linük nung yimsü alia amangertem aser arasener doctor temi parnok anema nokdak.

Crusade agiba mapang nung iba tesem anasaji parnoki timtem agüja liasü. Iba mapang nungji Kolenda-i social media ajanga, "Kenya nung ozü Team Member atema sarasademdaksüner. Kenya nung longkak aiterteri rara tenzükogo. Parliament building rongdar aser tang tashi nung nisung ter asüba jangjaogo. Tang onok aliba tesem densema Kenya kübok yimti aika nung raradar. Gari lenmangtem mokdang aser

onok nem-a timtem agütsütsü ta osang angazüker. Long amshia onok gari amaktsüa akok mesüra gari nung mi senoktsütsüa akok. Onoki iba tesem süia moutetba agi aonung iba tesem nung anenzüka liasü. Asüng onoki timtem majangshii otettsü atema sarasademjang," ta metetdakja liasü.

Ajisüaka Uganda linük tesem ajaklen asentenshi milak ka jangrudar; nisung aika taneptsüba angur, temenen tanela aridoktsür aser aikati Khrista agizüker, ta CfaN-isa metetdaksü.

Africa tesem ajaklen Yisu Khrista osangtajung proktsü atema CafN ministry-i sayutsüngirtem aika aniteter aser ibaji ajanga mapang ka nung dang linük tesem balala nung crusade sentong aika agiteter. Item sentong rongnung 'CfaN Evangelism Bootcamp' aser "Decade of Double Harvest" densema lir.

Uganda kübok Lira yimti nung aonung shia crusade sentong nung adentsü atema nisung teimba-teimba dang arur aser aikati Khrista agizüker, ta Kolenda-i metetdaksü.

Hoima nung ayongzükba crusade sentong nung paralyse asüba tetsür sowar ka lisü agi alener aru. Arasenba osettem rongdokja sarasademtsüba sülen la idangyongjisa temang nung taneptsü angur, nüchi aküm aser tashi arua liasü.

Busia nung o mejembiteter aser temenen tanelai apuba tetsür ka atema sarasademtsüba sülen lai o jembi tenzüka liasü. Iganga nung nisung meyrjang aikati Khrista agizük aser Gulu nung nisung aikati arasenba osettem rongdoker Khrista agizük.

Daniel Kolenda aser pai aniba teloki tesem ajaklen crusades ayongzükba agiba ajanga Arogotem nung züngsem kanga renlokdar. Gulu nung aliba Arogo ka nungbo züngsem shilem 400 agi teimba renlokogo.

Tang mezüng Khrista agizükertem nem Khristan yimsü tamendakdak indang kaket kaka agütsür aser parnok local Arogotem nung züngoka tanela nung aintsü atema parnok dang lenmang sayur.

Uganda nung ano crusade 8 agitsü ayongzükba lir.

New York nung Yisu kürakyanglu raksatsü

July 07, 2024: New York kübok Queens county nung aliba Holy Family Roman Catholic Arogo Tenla kima nisung kati Yisu Khrista kürakyanglu raksatsü, ta Diocese of Brooklyn-i metetdaksü.

Taoba Amongnü (June 30) anepdang Yisu kürakyanglu raksatsüba sülen CCTV noksa nung ajemdaker police-i taxi anishir ka bushidar.

Anepdang 5:30 ako meta nisung ka taxi nungi ayazüka aluba sülen Holy Family Arogo Tenla kimalen jagi aoba sülen kürakyanglu raksatsür.

Iba Arogo nung pastor, Sean Suckiel-i, "Nisungbaji kürakyanglu anasa oa St. Joseph kürakyanglu raksatsüba sülen Yisu kürakyanglu

raksatsür. Pai Yisu kürakyanglu tekolakbo tepzükba yoker. St. Joseph aser Mari na indang kürakyanglu jibo pai junga meraksatsütet," ta metetdaksü.

Brooklyn Diocese-i, New York Police Department-i iba tatalokba ya tesempa agi inyakba mapa lir ta züngshia bushisüngdang tenzükogo, ta metetdaksü.

Arogoisa, nisungba jagi kürakyanglutem raksatsüba ajanga dollar sen 20,000 takoksa nguogo, ta metetdaksü.

Pastor Suckiel-isa, "Item teraksatsüba ajanga kü melung raksar. Kechiba nisungba jagi yamai inyak?, ta kü melung nung tasüngdangba akar. Pai metetsümonga iba ya inyak.

Kechiba inyak? ta ni süngmanger," ta metetdaksü.

"Onoki nisungba atemaji sarasademtsür aser ochi temeden aginer. Onoki tai atoker aser saka pai nüchi nungbo yamai meinyaktsü südi ta onoki bilemer," ta pastor-isa shisem.

Tesüba küm ishika tsüngda United States nung Tenla kitem aser Arogo kiojentem anema inyakba kanga bulua atalokdar, ta Family Research Council-i metetdaksü.

2023 küm US nung Arogotem anema inyakba tatalokba 436 liasü aser ibaji 2022 küm Arogotem anema inyakba tatalokba den medemdangra ibaji anasü agi teimba akümba lir.

ANOGO ABEN TSÜNGREM DEN

Tongpang rara mesüra tazüokba ?

Kechiaser Kibubai shiba dang meimer pa merenshir aser Pai agizükba techir ajak dak azüker. Ibri 12:6.

Khristan shia jangratemtsü masüba mapatem atalokba ajaki tanelaren tongpang rara ama bilemer. Kodang timtem ka atalokdir, idangjisa iba timtem agentsü aikati Tsüngrem dang asüngdang. Parnok timtem tebilemstüji Satan mesüra tanelaren kechi prok aji arur (Gal. 6:7) ta agizükdang nungibo Satani asenok amaker ta agizübaji tali tamarenba lir.

Temeim Tebui arütsübaji Satani merenshir ta aibilena angatettsü akok. Nai tanelaren tesayur ka ama tanur dang mesayura, Tsüngremi parnok temenen nung tsükdaktsütsü akok. Na tenzük nung ochi meshira na melenshitsü asoshi iba nungi adokbaji nai agidaktsütsü akok. Ne mulung masüba temulung süa kümdakjang ta sarasademtsübaji tamashi asütsü. Nai temulung agütsütsü aser ne taküm nung nüngdak temelenshi adokdaktsütsü asoshi Tsüngremi na azüoker. Ne tebilemstütem Tsüngremi azüokba den sendaktepa melira koda lendong. Tsüngrem azüokba Satan mapa aser tanelaren tongpang rara ka ama agizükra Tsüngremer tazüokbai kodanga meyaritettsü. Nai ajuruba timtem ajakji Tsüngremer tazüokba masü, saka Tsüngremi na azüoker ta Laishibai sayur.

Tsüngremi arütsüba nai mangatetra Tsüngremi ne sarasadem melangzür aser Satan nungi kümzüktsü makoker ta nai tenüng asentsü akok. Saka nai temenen menabayong timtem ajurur ta Tsüngremi ne nem tekümdangtsü agütsür. Ne taküm nung timtem mapang ajurur asü? Ibaji Tsüngrem tazüokba asü? Tsüngrem, shiba temeim nung tabensa lir, Pai tatem nung tajung agütsütsü Pa mulung nung alinung Pai na metongshitsür.

Indonesia nung Khristantem anema apusodaktsütsü meranger

July 07, 2024: Indonesia nung Khristan yimsü kanga proker, ta osang sangokja Khristantem anema apusodaktsütsü nükjidong nung Islam yimsü alia amangertemi #SaveMaryam ta ser Islamic social media campaign ka tenzükogo, ta International Christian Concern (ICC)-i metetdaksü.

Iba campaign manager-i, küm shia Indonesia nung Muslim nung million 2-i Khristan yimsü dangi meyiper, ta metetdaksü.

Paisa, tang Indonesia ya Muslim nung majority linük ka süaka 2035 küm tashi nungbo Indonesia ya Muslim nung minority linük ka akümtsü, ta metetdaksü.

Nisung aikati iba campaign team-i tiyazü nung nüburttem aoksadakja yimsü nung ajemdaker tensa raksatsütsü meranger; parnoki parnok mapatem atema senotsü bendentsü nükjidong nung osang tai proker, ta aitsür.

Alima nung Muslim nunger nütsüng teimtiba aliba linükji Indonesia lir. Iba linük nung Muslim nung million 212 lir. Official osang ajanga ashiba agi, iba linük nung nütsüng shilem 11 dang Khristantem lir. Indonesia nung Arogo lenirtemibo, iba linük nung nütsüng shilem 20 nungi shilem 30 bo Khristantem lir ta bilemer.

Indonesia nung Khristantemi reshikangshi kanga ajurur, talisa Islam yimsü toktsür Khristan yimsü agizükertembo kinüngertemia sendoker.

Indonesia nung talisa Aceh province nung Islamic ozüng sashia benoka lir, ibayongji iba province nung Khristantem kanga reshikangshir.

Cornell University indang research ka ajanga-a, 1990 küm Indonesia nung nütsüng shilem 1 dang Khristantem liasü saka tanübo iba linük nung nütsüng shilem 10 bo Khristantem lir, ta bushitetogo.

AO OSHI ANGAZÜKDAK:

TANÜ ANGAZÜKTSÜBA OJANG



Tajang

(adj) tashi tait aser temerang (strong and hardy)

* Chi tajang chiyongertem tetsüng-teben tajang asür.

Tajangtsü

(n) nok ajangba oset (tool handle)

* Longmi tazüng agi nok tajangtsü yanglur.

OLONG PAITEP # 6840

Grid for OLONG PAITEP # 6840 with numbers 1-15 in various cells.

TIPLÉN

- 1. Balaka
6. Aika shirangba
7. Tar tatsü
9. Nenü'er jabaso
10. Sen latettsüba
11. Tangar kübok alir
14. Lon nung inokba
15. Tzü ayimdak
16. Ajok

LANGTSÜNGLEN

- 2. Hai sür inyak
3. Aor tenüng ka
4. Ali telungi talangka lur
5. Tebang kenyongi mazüoker
8. Ken atema anenzükertem
9. Toktepa noktak
10. Sen
11. Benjong agi
12. Telung nung rizünga ayu
13. Tebang nung enok

OLONG PAITEP # 6839 TELANGZÜBA

TIPLÉN :

- 1. Semtu, 3. Lepko, 5. Bilem,
8. Ulu, 10. Tsünpang,
11. Tesangwa, 13. Aoksa,
15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
6. Lungkak, 7. Milak,
9. Zünga, 10. Temopu,
12. Walu, 14. Ali.

NAI-A YA METETTER MA



China nung Regent International apartment building nung nisung 20,000 tema alir. Iba ki ya Hangzhou kübok central business district Qianjiang Century City nung lir. Mezüngbo iba ki ya hotel ka lapoktsü atema yanglu saka tatem nung residential apartments meyirjang aika yanglu. Azüklen feet 675 talang tua yangluba Regent International nung nisung 30,000 shi alitsü akok saka tang nisung 20,000 shi lidar. Iba ki telung nung giant food court, swimming pools, barber shops, nail salons, medium-sized supermarkets aser internet cafes lir.

Assam nung IFS officer Muanthang Tunngung mapa nungi anentsü



Guwahati, July 7, 2024 (Agencies): Assam sorkari 2000-batch Indian Forest Service (IFS) ketdangsiuri Muanthang Tunngung mapa nungi anentsüogo.

Sorkari transfer orders agütsüba tashi mangaba atema pa mapa nungi anentsü.

Tunngung ya Dima Hasao district nung Chief Conservator of Forests (CCF) inyaka liasü aser February 2024 nung sorkari pa Manas Tiger Reserve atema Field Director inyaksü mapa belen.

Ajisüaka Tunngung-i mapa tasen magizük aser iba jagi pa mapa nungi anentsür ta sorkar sangdong ka nung ashi.

March 2024 nung pa Dima Hasao nung CCF aser ano Southern Assam Circle nung CCF additional charge mapatem

nungi sodi agüja liasü.

Sorkari transfer orders agütsüba sülen hopta ka tsüngda mapa melentsü inyakyim lateta lir saka Tunngung-i tashi manga ta sorkari ashi.

All India Services (Conduct) Rules, 1968 nung lateta aliba ama meinyakba ajanga Assam sorkari All India Services (Discipline and Appeal) Rules, 1969 kübok Tunngung mapa nungi anentsüogo.

Tunngung mapa nungi anenja aliba mapang pai Guwahati nung Principal Chief Conservator of Forests den osang lemsateptsü.

Congress MP Sangma-i VPP MP Syngkon den amalitepa inyaksü

Guwahati, July 7, 2024 (Agencies): Tura MP Saleng Sangma-i VPP Shillong MP Ricky AJ Syngkon den amalitepa Meghalaya nung onük balala ateam inyaksü metetdaksüogo.

Parliament nung Meghalaya dak sendakba onüktem benoka lemsateptsü ta Sangma-i ashi.

Parliament nung education, healthcare, arrtsü, Inner Line Permit (ILP) aser Eighth Schedule nung Khasi o oshitem züngsemsü onüktem jembitsü

ta pai ashi.

Centre sorkari Meghalaya nung ILP tenzüksü atema telangzüba magütsür anungji party züngsem ajaki iba onük ya Centre den jembitsüla ta Sangma-isa ashi.

Külen, Khasi Students' Union (KSU)-i Inner Line Permit (ILP) system tenzüksü takhangba agüja July 6, 2024 nü Ri Bhoi district kübok National Highway 6 nung check gate ka lapokogo.

Meghalaya Assembly-i 2019

nung ILP tenzüksü atema bangzüng ka renem saka tang tashi Centre sorkari iba atema telangzüba kecha magütsü lir.

State sorkari Meghalaya Residents Safety and Security Act (MRSSA) mapa metenzükba atema KSU-i aitsü.

"Iba ya KSU atema inyakyim tasen ka lir. Centre aser state sorkartemi Meghalaya nung ILP metenzük tashi onoki lungkak aitba manentsü" ta KSU-isa metetdaksü.

Goalpara nung Meghalaya lanur ka tepsetba atema 8 apu

Guwahati, July 7, 2024 (Agencies): Meghalaya nungi lanur ka Goalpara nung rehab centre ka nung tepsetba dak sendakba nung Assam police-i nisung 8 puogo.

Tasüsang ya Niksamseng Marak ta jangjaogo aser June 2 nü pa den külemi nisung ana ket nung drugs bena aliba atema

apu.

Par asemprong ya Goalpara nung aliba New Life Foundation rehab centre nung aniok. Ajisüaka June 3 aonung Niksamseng Marak sür lia angu.

Mezüngbo pa soseta asü ta jembi saka CCTV footage repringdangdang rehab centre nung inyakerkem aser külemi

puoka ayurtemi pa tepsetba lir.

Goalpara Sadar Police-i video kuli anguba sülen bushisüngdang ka tenzük aser tang tashi nung nisung 8 puogo.

Police-i apurtem rongnung Pranjyoti Nath, Hanif Ali, Jintu Chakraborty, Mohsen Khan, Kunal Das aser Dhanmoina Banikya nung dena lir.

Tripura nung BSF-i AI-enabled cameras amshia arrtsü anüker



Agartala, July 7, 2024 (Agencies): Border Security Force (BSF)-i Tripura nung India-Bangladesh arrtsü nung security maparen akangshiogo.

BSF-i Artificial Intelligence (AI) enabled cameras aser facial recognition dena surveillance technology amshitsü tenzükogo.

"BSF sepaitemi akhi ama patrolling senzüba den surveillance technology amshir. Iba nung Artificial Intelligence (AI)-powered cameras aser facial recognition tools lir dena"

ta BSF Tripura Frontier Inspector General Patel Piyush Purushottam Das-i ashi.

BSF-isa tesem kar nung nübo teimba lemzüksüogo aser arrtsülen smuggling aser tout networks makdoktsü atema special operations tenzükogo ta pai ashi.

Tripura Chief Minister Manik Saha-i BSF dang ozüng alema nisungtem aruba azüoktsü atema tetuyuba agütsüba sülen anogo asem lir iba mapa tenzükogo.

BSF-i India-Bangladesh

arrtsülen atsü matsüdangi aliba tesemtem nung additional teams mapa lemzüksür. BSF-i state police aser security agencies den külemi joint operations nung temulung agütsür ta Das-isa metetdaksü.

Taküm küm tenzükur BSF-i Rs 29 crore alang ozüng alema shibelena osettsüsettem puogo. Iba dak sendakba nung Bangladeshi nung 198 aser Rohingya nung 12 puogo.

BSF-isa tang tashi nung Rs 32 crore alang narcotics aser psychotropic drugs puogo.

US-i benokba sentong Hamas-i agizüker, ceasefire teimla lir

Jerusalem, Chiteni/July 07 (Agencies): Sepai aser teburtem kar densema Israel nung pua aliba chiochtsü atema jembishinü tenzüksü US-i asüngdangba Hamas-i agizükogo, ta osang balala ajanga Honibarnü ashi.

Teti atema ceasefire alitsü atema tezüngzüktep ka züluteptsü Israel-i mezüng mulungba sülen ang yimjung ken o jembishinü tenzüksü melatsü ta Hamas teloki khanga aliba indokogo.

Iba proposal ya Israel-i agizükra iba ya ajanga framework agreement ka yanglutsü aser Gaza nung Israel aser Hamas tsüngta ita toku raraba ya tatem kati arutsü akok, ta osangtem ajanga ashir.

Yimjung ken o jembitsü atema Central Intelligence Agency Director William Burns taruba hopta Qatar-i aotsü ta ashir.

Iba jembishinü nungya

Hamas-i akhangba ama United States, Israel, Qatar aser Egypt linük temi tezüluba nung khen atema ceasefire alitsü, teyari oset agütsütsü aser Israel sepaitem ainshitsü atema rangloktsü.

Tangatetep kati arutsü asoshi tangya maongka asangdang lir, ta Israel nung osang kar ajanga ashir.

Taoba mapangbo Hamas-i akhangba ya agizüketla masü ta Israel-i shia liasü. Taruba hopta ken o maneni jembitsü saka telok ana tsüngta tawa tang tashi lir, ta ashi.

US ketdangsur katia Hamas telemtetba jangjashitsütsü memulung saka "Terenlok shidakba lir, saka ano teinyaktsü jenti lir," ta shia liasü.

Hamas-i October 7 nü Israel south tsütsü amakdang nisung 1,200 tepseter ano nisung 250 shi poua bener aoba sülen iba rara nung Palestine nung nisung 38,000 dak tema

tepsetogo, ta Gaza nung aliba health ministry ajanga ashir.

Tang proposal tasenba ya ajanga tetsüngtai ia yimjung ken o jembir temi ken atema ceasefire alitsü, aid delivery agütsütsü aser jembishinü matem tashi Israel sepaitem Gaza nung ainshia alitsü nükla nung jembishinü asütsü.

Washington, Israel aser Qatar tsüngta ceasefire alitsü aser Gaza nung pua alirtem chiochtsü asoshi jembishinüba tali tesashiba kumogo. November ita US tir election magidang Washington-i yimjung tezüngzüktep ka yangluner.

Gaza nung October 7 nü nungi tenzükta Israel-i amakdang nisung 38,153 tepsetogo aser nisung 87,828 yirur lir, ta Gaza indang Health Ministry ajanga Deobarnep ashi.

Tesüiba ghonda 24 tsüngta Palestine nung 55 tepsetogo aser 123 yirutsü, ta ministry ajangasa ashir.

Pakistan-China tesendaktep putu tasen ka tenzükogo: PM Shehbaz



Islamabad, Chiteni/July 07 (Agencies): Information technology, communication, mining aser energy sector tem nung Pakistan-China tesendaktep putu tasen ka tenzükogo aser iba yagi rongsenketzung terenlok aser tesendaktep tali takangba alitsü, ta Pakistan Ato Kilonser Shehbaz Sharif-i ashi.

Sharif-i tawa China semdangba mapang agreements aser MoUs züluteptatem mapa kuma inyaktü atema Honibarnü Islamabad nung pai anir senden ka amendang iba o ya shia liasü.

Item wadang nung Pakistan-China tesendaktep ajanga linük ana tsüngta tesendaktep tajungba akumtsü, rongsenketzung renloktsü aser region nung tesendaktep tashi taiba akumtsü, ta ato kilonseri ashi.

Tensa mejungi aliba mapang ajak nung China-i Pakistan yaria arur. China ya rongsenketzung tsütsü tashi taitba kumogo aser Pakistan-ia yamaji inyaktü, ta pai ashi.

Arishi küm 72 tain Pakistan Muslim League-Nawaz leniri China semdangba mapang tezüngzüktep balala yangluba nung dangari timtem agütsüra tatok malitsü ta ashi aser item agreements aser MoUs ya pai repranga inyaktü ta sangdong. Ato kilonser dang tawa China nung tsüngsem yangluba company temi Pakistan semdanga linüki parnok indang manufacturing units bener arutsü sentong yangluba indanga lemsatapa liasü, kong item China nung company temi sen USD 5-8 billion shi indoktsü akok.

Aluyimba tsütsü taküm Pakistan nung agitsü aliba

Food and Agri Expo nung China nung company tulu 12 arua shilem agitsü ta ashi.

Agriculture sector tsütsü sorkari scholarship agüja advanced training agitsü atema Pakistan nungi kaketshir 1,000 China dangi yoktsüba maparen terenlok indanga Sharif-i osang agitepa liasü.

Gilgit-Baltistan aser Pakistan-occupied Kashmir densema province pezüprong nungi kaketshirtem ya merit nung ajemdaker China-i yoktsüla aser Balochistan ama backward area nungi kaketshir nem temulung balaka agütsütsüla, ta pai ashi.

Business aser investment atema China nung company 100 dak temai Pakistan nung company tem den osang agiteptar, ta iba senden nung pa dang ashi.

Huawei ajanga kaketshir 3,00,000 nem technical training agütsüba indanga iba senden nung jembia liasü.

Region nung Gwadar ya region nung shishilempaba tsütsü tesep ka kumdaktsütsü atema Gwadar Seaport, Gwadar Airport, aser Gwadar Industrial Zone renloktsü atema mera agitsü asoshi Sharif-i shisa agüja liasü.

SÜR KÜM KA AJUNGBA BILEMTETER



Asür Purniken Longchar (01.10.1926-08.07.2023)

Küm ka süyigo aser na maliba onoki kanga jangja meteter. Onok ajaki nü temeim, shisatsü aser na aliba tesangwa menunrar, koba nai onük nem agütsü. Nai anisüngzük o jembiba aser len aniba, onük mulungjang nung na teti alir. Na onok den meliaka nü o aser nü mapa tajung agi onük maneni len anitsü aser anogoshi onok ajungmesotsü.

~Temeim kinungtsü, chirnur, semchir aser tanabuba semchirtem

MENUNGRA BILEMTETER



Asür Longertula (Chuchuyimlang Village) 8th July 2023

Kodanga amatetsü makokba temeim oja, nai onok iba akümüli nungi toktsür or tanü küm ka ajungba bilemteter aser ne temoatsüma nung onok jangratema alir.

Anogo aser kümtem süidema oaka na teti onok mulungjang nung lir.

Temeim kinungbo, chirnur, semchirtem aser kinungertem



METETDAKTSÜR

- Electricity Act, 2003 indang Section 62 aser Section 79 (1) (d) aser Central Electricity Regulatory Commission (Conduct of Business) Regulations, 2023 read with Central Electricity Regulatory Commission (Terms and Condition of Tariff Regulations) 2019 indang Regulation 15 (1) (a) aser regulation 23 kükok North Eastern Region nung "North Eastern Region Strengthening Scheme-XIII" kükok tariff for assets jangjatsü atema petition.
- Tekalen shia aliba Transmission system indang beneficiaries ya (a) Govt. of Arunachal Pradesh (b) Assam Power Distribution Co. Ltd. (c) Manipur State Electricity Distribution Co. Ltd. (d) Meghalaya Energy Co. Ltd. (e) Power & Electricity Dept. of Mizoram (f) Dept. of Power Govt. of Nagaland (g) Tripura State Electricity Board alitsü.
- Tariff tejangja:

Name of the Asset	Asset-1	Asset-2
Schedule DOCO (FR)	30.09.2022	30.09.2022
DOCO (Actual)	01.04.2023	19.05.2023
Estimated Completion Cost (Rs in Lakhs)	1513.83	928.47
Tariff for year 2019-24 (Rs in Lakhs)		
2019-20	-	-
2020-21	-	-
2021-22	-	-
2022-23	-	-
2023-24	195.79	103.38

4. Iba tariff jangjatsü atema application copy ka applicant indang website www.powergrid.in nung inokja lir.

5. Iba application nung shia aliba iba tariff indang proposals nung temelenshitsu aser tai aputsü lira, beneficiary densema nisung mashi-i Secretary, Central Electricity Regulatory Commission, 6, 7 & 4th floor, Tower B, World Trade Centre, New Delhi (mesüra Commission aliba dang office dangi) iba sangdong adoker anogo 30 tsüngta shia aliba corporate office nem applicant dangi copy ka dener yoktsüla.

Place : Gurugram Date : 02.07.2024 Mgr (Commercial)

POWER GRID CORPORATION OF INDIA LTD

(A Government of India Enterprise)
Registered Office: B-9, Qutab Institutional Area, Katwaria Sarai, New Delhi-110 016
Corporate Office: "Saudamini", Plot No.2, Sector-29, Gurugram, Haryana - 122 001

Nepal tüzümsüng lendong nung nisung 14 süogo

Kathmandu, Chiteni/July 7 (Agencies): Tzünglu kanga sashia aruba ajanga Nepal kükok tesem balala tzu agi nung nisungtem taküm metsüngba aser anentsüh samaogo aser kar samara aluba sülen nisung 14 süogo aser nisung teku samara bushidar, ta police-i Deobarnü metetdaktsü.

Kidanger India aser Bangladesh na nunga tüzümsüng agi teraksatsüba tulu adokdaktsüogo aser nisung million aika dak kongshio.

"Tanga agency aser local tem den longjemer police-i samara alirtem bushidar," ta

Nepal police otongdar Dan Bahadur Karki-i ashi.

Linük kükok tesem balala nung nisungtem taküm bushidar, ta pai ashi.

Kümshia South Asia nung June ita nungi September ita tashi nung tzünglu kanga aruba ajanga nisung aika taküm samara aser iba den teraksatsüba tulu bener arutsür, saka küm ishika tsüngda tüzümsüng aser anentsüh lendong tesashiba ataloka arudar.

(Maneni tapak 8 nung...)

Niger, Mali & Burkina Faso military lenirtemi tenangzüktepba tasen yanglu

Niamey, Chiteni/July 7 (Agencies): Burkina Faso, Mali aser Niger military lenirtemi linük asem tsüngda tesendaktep akangshitsü atema teangzüktepba tasen ka nung sign süogo. Iba ajanga parnok anüolen aliba linük aser Africa nung taoba mapang parnok sendaktepa aliba linüktem nungi tali atsünginba sayur.

Honibarnü summit ka amenba mapang lenir asem yagi confederation treaty ka nung sign süogo, koba taoba küm mutual defence pact Alliance of Sahel States (AES) sangdongba akangshitsü nükjidong nung yangluogo.

Linük asem nung sorkar atsüngoka yimsüsü tenzükba sülen Niger General Abdourahmane Tchiani, Burkina

Faso Captain Ibrahim Traore, aser Mali Colonel Assimi Goita nung tang mezüngbuba summit ka menogo.

Kasa mapang nung linük asem ya regional bloc Economic Community of West African States (ECOWAS) nungi January ita atsünginba sülen ita ishika lir tang iba jenjang ya agiogo.

(Maneni tapak 8 nung...)

Euro 2024: Netherlands-i goal 2-1 agi Turkey koka semi-i iogo



Netherland-i Turkey koker asayartem pelatepba angur

Chiteni/July 7, 2024

(Agencies): Honibarnü Euro asayamung quarter final pezübuba nung Netherlands-i tesülen nungi meyipa tur Turkey goal 2-1 agi kokogo.

Asaya tanabuba shilem nung minute 76buba nung Stefan De Vrij-i own goal ka idaktsüba ajanga Turkey team tamakok angua liasü.

Asaya nung mezüngbuba goal ya Samet Akaydin-i

Turkey atema idaktsü, saka Stefan De Vrij-i asaya tanabuba shilem nung Netherlands atema goal ka idakja kasasa aküm.

Iba asaya akokba sülen Netherlands pur Bodhbarnü Dortmund nung England den semifinal asayatsü. Kasa mapang nung tanga semifinal ka nung Mongolbarnü France aser Spain na asayatsü.

Iba asaya nung Turkey team

nungi defender Merih Demiral-i maliasü, shiba nem UEFA-i asaya ana atema tenokdangba agütsüogo. Mongolbarnü goal 2-1 agi Austria akokba asaya nung pai teka agi tashishitsü aketba temaitsü ka sayuba sülen pa merenshiogo.

Asaya nung mezüngbuba goal ya Akaydin-i minute 35buba nung idaktsü. Iba sülen Netherlands nung asayartemi iba goal küptoktsü kanga meranga asaya liasü.

Asaya tanabuba shilem nung Dutch coach Ronald Koeman-i Steven Bergwijn melena forward Wout Weghorst yok aser pai asaya nung temelenshi bener arutsü.

Goal idaktsütsü atema kanga meranga asayaba sülen tatem nung De Vrij-i minute 70buba nung par team atema goal ka idaktsü. Iba sülen minute trok dang lir Muldur-i own goal ka idakja Netherlands-i asaya akok.

Copa America: Uruguay-i Brazil koka semi-finals-i iogo

Chiteni/July 7, 2024

(Agencies): Honibarnü tang asaya aliba Copa America asayamung nung Uruguay aser Brazil na quarter final asaya team kati dang goal magütsüteti tembangba sülen Uruguay-i penalty ajanga takok nguogo.

Asaya nung minute 74buba nung Nahitan Nandez nem red card ka agütsüba sülen Uruguay pur asayar ter agi dang asaya tembanga liasü. Parnok Bodhbarnü Charlotte, North Carolina nung Colombia den semifinal asayatsü.

Honibarnüsa Arizona nung Colombia-i goal 5-0 agi Panama kokogo.

Maneni Mongolbarnü semifinal tanga ka nung world champions Argentina aser Canada na asayaba angutsü.

Team ana tsüngda Honibarnü kanga toktepa asayaogo aser asaya nung

asayartemi foul 41 tashi mena liasü.

Ground memedemba ajanga team anapronglai parnoki asayanüba ama masayateti kanga timtema liasü.

Asaya nung goal idaktsütsü atema maongka tajuntibaji minute 35buba nung Uruguay striker Darwin Nunez-i angu, ajisüaka pai timing magiteti ball junga metongoktsüteti liasü.

Mapang tatsüka dang lir Brazil nung asayar Raphinha-i ball kanga junga bener lua metsüoktsü, saka Uruguay keeper Sergio Rochet-i ball kanga junga nokdanga liasü.

Asaya nung team anaprongla nungi asayartemi melentepa foul menatapa asayayonga aoba sülen Nandez-i minute 74buba nung Rodrygo kanga mejungi alangdakja liasü aser VAR asadangba sülen pa nem red card agütsü.

Iba sülen Uruguay pur mapang tembangtsü atema dang yongyatepa asaya, kechiyong Copa America nung mapang apuloktsür masayar, saka indang indanga pelalty dang asayar.

Penalty metsütepba mapang Federico Valverde-i mezüngbuba goal idaktsü saka Eder Militao-i metsüba ball Rochet-i nokdanga liasü. Douglas Luiz-i post ball metsüloktsüba mapang Brazil team 3-1 agi tesülen liasü aser Jose Gimenez-i Uruguay atema goal idaktsü asübo parnoki idangji asaya akoktsü liasü, saka Alisson Becker-i kanga junga nokdang.

Brazil atema substitute Gabriel Martinelli-ia goal idaktsü, saka Uruguay atema midfielder Manuel Ugarte-i aibelen kecha mesüi goal idaktsüba sülen parnoki asaya akok.

Asaya ajak kasasa benshiang: Chirag Shetty

Chiteni/July 7, 2024

(Agencies): T20 World Cup akokba atema Rohit Sharma, Suryakumar Yadav, Shivam Dube aser Yashasvi Jaiswal nung nem Maharashtra sorkari tetushi agütsüba sülen cricket asayartem benshiba ama tanga asaya nung asayartem dang mebenshiba atema Chirag Shetty-i sorkar aitsüogo.

2022 küm Thomas Cup akokba mapang India team nung tongtibang shilem agisang Chirag-i, Bangkok nung India badminton team-i iba tetushi team asayamung final nung nung Indonesia 3-0 agi akokba mapa pai linük team asoshi tongtibang shilem agiba züngshia maliba atema state sorkar aitsü.

Mumbai nungi asayar Chirag, shiba Paris Olympics atema pa indang partner Satwiksairaj Rankireddy den Hyderabad nung national camp nung shilem agidar, pai cricket mesüra cricket asayartem anema pai kecha tamajung bilema mali ta ashi.

“Ni cricket anema kecha tamajung bilema mali. Onok badminton asayartem ajak T20 World Cup final TV nung live repringogo aser onok ajak benjungtepa liasü. Final nung South Africa akokba atema onok ajak kanga pelatep aser nema danga liasü. Kasaji onoki küm ana tejakdang takok tajung ngutetogo, ajisüaka state sorkari senpet agütsütsü toktsür kü nem tetushia magütsü. 2022 küm

masü dang India badminton team-i iba asayamung nung semifinal-a tonga asayar maliasü, saka onoki otsü tasen ka yanglua iba asayamung kokogo,” ta arishi küm 27 tain asayar yagi ashi.

Maharashtra-i Hokolbarnü sangdong ka ajanga T20 World Cup akokba India team nem senpet sen crore 11 agütsütsü nangzükogo.

Chirag aser Satwik na ya India nung tebur tarep asayartem rongnung world No. 1 jenjang atonga mezüngbuba tarep lir. Tenati Asian Games, Commonwealth Games aser Olympics nung India team aiben takok dangi aniogo, iba den tenati BWF World Tour titles-a aika kokogo.

ADSC nung Abhay-i takok tajung angu

Chiteni/July 7, 2024

(Agencies): Asian Doubles Squash Championships nung Deobarnü India nung asayar Abhay Singh-i asaya ana nung takok nguogo.

Asian Games team championship gold medallist Abhay-i, Velavan Senthilkumar den külemi tebur tarep asaya akok. Top seeded tarep yagi final nung Malaysia nung second seed tarep Ong Sai Hung aser Syafiq Kamal 11-4, 11-5 na koka liasü.

Iba sülen tarep temeyoktep asaya nung Abhay aser Joshna Chinappa nati second-seeded Hong Kong nung tarep Tong Tsz Wing aser Tang Ming Hong na 11-8, 10-11, 11-5 i agi koka liasü.

“Hopta tepeyong Abhay künati kanga junga asayatetba atema kanga pelar. Künati kanga temulung

lemteta asayaogo aser asayamung nung asayayonga atuba mapang tajungba aküm,” ta Senthilkumar-i ashi.

“Mapang talangka lir SRFI aser HCL nati mapang shidak nung National Doubles Championships lepa repringshio aser iba ajanga onok nem teyari agütsüogo,” ta Senthilkumar-isa shisem.

Joshna, shiba nem taküm küm tetenzüklen Padma Shri award agüja liasü lai, “India tenüng nungi tanaben asayatetba ya ni atema kanga tongtibang, kechiyong ni temekok surgery agiba sülen ita pongu tashi masayateti liasü,” ta ashi.

“Ni PSA Tour nung masaya tsüngda India tenüng nungi tarep asaya asayaba ya maongka tajung ka liasü,” ta Laisa shisem.

BENDANGLI OSANG : Tapak 7 nungi...

Niger, Mali & Burkina Faso military...

Honibarnü senden nung o jembiba mapang Tchiani-i, küm 50 tain ECOWAS ya linük asem atema amokmeren ka lir ta ashi.

Linük asem nung military-i sorkar atsüngba sülen West African economic bloc yagi linük asem ya iba telok nungi mintoka liasü. Niger nung 2023 küm July ita, Burkina Faso nung 2022 küm September ita aser Mali nung 2021 küm August ita military-i sorkar atsünga liasü.

ECOWAS-isa, Niger aser Mali nem tenokdangba kar agütsüogo, saka iba bloc lenirtemi linük asem ya meyipa arutsü ta timla akar.

“Onoki ECOWAS melena AES tentetsü, kechiyong

ECOWAS ya bendanger tashitem tetuyuba nung inyaksangshir,” ta Tchiani-i ashi.

Burkina Faso military lenir Traore-ia, par linük nungi tajangzük agitsü atema inyaksangshiba atema bendanger tashitem aitsüogo.

Maneni Mali lenir Goita-i ashiba agi, tesendaktep akangshiba tetezü, linük asem rongnung ka danga makra aji linük asemprongla amak ama asütsü.

Al Jazeera osangbener Ahmed Idris-i ashiba agi, Nigeria yimtiba nung ECOWAS senden amentsü anogo ka lia military lenir asem ya ajurutepogo.

Nepal tüzümsüng lendong nung...

Mongintemi ashiba agi, alima tzü mopung melenshiba aser lenmang tali yangluba ajanga tebilemtsü taliba kumdaktsür.

Nepal kübok tesem kar nung Brehostibarnü nungi tzunglu kanga sashia arudar aser iba ajanga disaster management ketdangsurtemi ayong aika moshia yima tzüshi alutsü akok ta tekümdangtsü metetdaktsüogo.

India den arrtsü nung lenden lima aliba district aika tzü agi metsünger aliba osang agütsüogo.

Taoba ita Nepal nung yipru tesashi ka aruba ajanga anentsüh, tsüngi aser tüzümsüng lendong nung

nisung 14 asü.

India nung tüzümsüng agi Assam kübok tesem aika metsüngogo aser taoba ghonda 24 tsüngda nisung 6 taküm samaogo, ta Assam State Disaster Management Authority-i Deobarnü metetdaktsü.

Kasa mapang nung Bangladesh nunga tüzümsüng agi nisung million ana dak tema dak kongshio go ta disaster management agency-i metetdaktsü.

Bangladesh ya timba ka Himalaya tenem nungi yima aluba ayong, Ganga ayong aser Brahmaputra ayong delta tem lir aser item ayongtem ya India ajanger tüzüym nung yimoker.

BILEMDANGANG

“Tia tensa ajak nung tenüngsang agütsütsü tamatok.”